

Evening Dogri (NSD) Bulletin 08-06-2024

आकाशवाणी

खास खबरां

- 1 केन्द्र च कल नमीं सरकार दे सगंध समारोह लेई तैआरियां जोरें-शोरें कन्नै चला'रदी ऐ। गोआंढी मुल्खें दे नेता प्रधानमंत्री नरेन्द्र मोदी हुंदे सगंध समारोह च शामल होंगन।
- 2 कांग्रेस दी कार्यसमिति नै राहुल गांधी गी लोकसभा च विपक्षी दा नेता नियुक्तकरने लेई इक प्रस्ताह पास कीता ऐ।
- 3 चुनां कमीशन नै जम्मू कश्मीर च विधानसभा चुनाएं लेई समान निशान मंगने आली सियासी पार्टिएं थमां दरखास्तां मंगी भेजियां न।
- 4 मतेयान करोआने सरबंधी राश्ट्री अजेंसी एनटीए नै आखेआ जे नीट मतेयान दी गरिमा कन्नै कोई समझौता नेई कीता गेआ ऐ।
- 5 एफआईएच हॉकी प्रो-लीग च जर्मनी नै भारत गी 4-2 कन्नै मात दित्ती।
- 6 मर्दे दे आईसीसी टी-20 विश्व कप च कल भारत दा मकाबला पाकिस्तान कन्नै होग।



PM-Swearing

केन्द्र च नमीं सरकार दे शपथ ग्रहण समारोह लेई सब्बै तैआरियां जोरें-शोरें उप्पर न। राष्ट्रपति द्रौपदी मुर्मू होरें प्रधानमंत्री नरेन्द्र मोदी होरें गी नमीं सरकार दे गठन लेई साद्दा दित्ता ऐ। कल संजा सवा 7 बजे राष्ट्रपति भवन च शपथ ग्रहण आयोजन कीता जाग। राष्ट्रपति होर नरेन्द्र मोदी ते उंदे मंत्री परिषद दे सदस्यें गी पद ते गोपणीयता दी सगंध चुकागंन। एह्दे शा पैहले बीजेपी दे

प्रधान जे.पी.नड्डा हुंदी अगुवाई च एनडीए दे इक प्रतिनिधिमंडल नै राष्ट्रपति हुंदे कन्नै मलाटी कीती ते इक पत्र सौंपेआ, जिस च गलाया गेआ हा जे नरेन्द्र मोदी होरें गी बीजेपी संसदीय दल दा नेता चुनेआ गेआ ऐ। एनडीए दे घटक दलें दे पास्सेआ बी समर्थन पत्र राष्ट्रपति होरें गी सौंपेआ गेआ। राष्ट्रपति भवन दे बाहरै पत्रकारें कन्नै गल्ल करदे होई मोदी होरें गलाया जे एनडीए इक मजबूत, स्थिर ते विकासशील सरकार दा गठन करोग। उनें गलाया जे भारत दे लोकें एनडीए सरकार गी इक होर मौका दित्ता ऐ ते एह् 18मीं लोकसभ नमीं ते युवा ऊर्जा दा सदन ऐ।

<><><><><><>

Oath

साढे संवाददाता नै खबर दित्ती ऐ जे नरेन्द्र मोदी हुंदे लगातार त्रीह बारी प्रधानमंत्री शपथ ग्रहेण समारोह च हिस्सा लैने लेई गोआंढी मुल्खें दे बक्ख-बक्ख लीडरें गी साद्दा दित्ता गेदा ऐ। गोआंढी मुल्खें ते हिंद महासागर क्षेत्र दे नेता समारोह च मुख् परौहने दे रूपै च शामिल होंगन। समारोह च हिस्सा लैने लेई बक्ख-बक्ख मुल्खें दे नेता, नमीं दिल्ली पुज्जा'रदे न। विदेश मंत्रालय नै गलाया ऐ जे श्रीलंका दे राष्ट्रपति रानिल विक्रमसिधे, मालद्वीप दे राष्ट्रपति डॉ. मोहम्मद मुइजू, सेशेल्स दे उप-राष्ट्रपति अहमद अफीफ, बंगलादेश दियां प्रधानमंत्री शेख हसीना, मॉरीशस दे प्रधानमंत्री प्रविंद कुमार जगनौथ, नेपाल दे प्रधानमंत्री पुष्पकमल दहल "पचंड" ते भूटान दे प्रधानमंत्री शेरिंग तोबगे होर समारोह च हिस्सा लेंगन। प्रधानमंत्री नरेन्द्र मोदी हुंदे लगातार त्रीये कार्यकाल दे शपथ ग्रहेण समारोह च विश्व नेताएं दी मजूदगी भारत दी पड़ोसी प्रथम नीति ते सागर दृष्टिकोण गी दित्ती गेदी सर्वोच्च प्राथमिकता गी दर्शादी ऐ। दिल्ली पुलस शपथ ग्रहेण समारोह दे चलदे सुरक्षा दे सख्त बंदोबस्त कीते गेदे न।

<><><><><><>

Eve-CWC-Meet

कांग्रेस दी कार्यकारी समिति नै सब्बने दी सैहमति कन्नै इक प्रस्ताह पास कीता ऐ जेहदे च राहुल गांधी होरें गी विपक्ष दे नेता दी भूमका नभाने दा अनुरोध कीता ऐ। अज्ज कांग्रेस कार्यसमिति दी बैठक मगरा इक संवाददाता सम्मेलन गी संबोधत करदे होई कांग्रेस दे वरिष्ठ नेता के.सी.वेनुगोपाल होरें गलाया जे राहुल गांधी हुंदा नेतृत्व इक मजबूत ते सतर्क विपक्ष दा निर्माण करोग। एहदे शा पैहले कार्यसमिति दी बैठक च कांग्रेस दे प्रधान मल्लिकार्जुन खरगे होरें कांग्रेस दे नमें चुने गेदे मिंबरें जिनें चुनां लड़ेआ ते चुनां च जित्त हासल कीती, उनें सब्बने गी ममारकबाद दित्ती। अज्ज दी बैठक च होरनें दे इलावा कांग्रेस दे वरिष्ठ नेता सोनिया गांधी, राहुल गांधी ते प्रियंका गांधी वाड़ा होर बी मजूद हे।

<><><><><><>

EC-JK Polls

जम्मू-कश्मीर च सितंबर म्हीने कोला पैहले-पैहले अपने विधानसभा चुनां करोआने दे अपने वायदे दी बत्तै पर इक अगड़ी गैं पुट्टदे होई चुनां आयोग नै इक्कै नेहा यानि समान चुनां निशान मंग्गने आली सियासी पार्टिएं कोला दरखास्तां लैने दा फैसला कीता ऐ। सुप्रीम कोर्ट नै पिछले बरे दिसंबर म्हीने च निर्वाचन दल गी निर्देश दित्ता हा जे जम्मू-कश्मीर च विधानसभा चुनां 30 सितंबर कोला पैहले करोआए जान। इक प्रेस विज्ञप्ति च भारतय चुनां आयोग नै आखेआ ऐ कि जिसले मानता हासल राष्ट्रीय ते राज्य स्तर दिएं पार्टिएं नै अपने रिजर्व चुनां नशान होंदे न, उस सूरतै च पंजीकृत गैर मानता हासल पार्टिएं गी सांझे चुनां निशान लेई अपने मेदवार गी चुनां मदान च तोआरने लेई दरखास्त देनी पौंदी ऐ। लोकसभा चुनां जम्मू-कश्मीर च लोकें दे बधी चढ़िए मतदान च हिस्से लैने कन्ने बड़े मते उत्साहित मुख् चुनां आयुक्त राजीव कुमार होरें जम्मू-कश्मीर च विधानसभा चुनां करोआने दी प्रक्रिया तौलें शुरू करने दी गल्ल आक्खी ही।

<><><><><><>

J&K Termination

जम्मू कश्मीर दी सरकारै राष्ट्र-बरोधी गतिविधिएं च मुलव्वस होने दे दोष च अज्ज 4 मलाजमें गी नौकरी शा बर्खास्त करी दित्ता ऐ। इंदे चा 2 जने पुलस मैहकमे च कांस्टेबल, 1 शिक्षा विभाग च अध्यापक ते 1 जल शक्ति विभाग दा मलाजम हा। सरकारी तौर पर हासल होई दी जानकारी मूजब इनें मलाजमें दिएं गतिविधिएं पर कनून नाफिज करने आली अजेंसिएं ते खूफिया अजेंसिएं तोड़ रक्खी दी ही ते छानबीन दरान इनें मलाजमें दी शमूलियत आतंकवाद सरबंधी गतिविधिएं च पक्की होई गई जेहदे परेंत इनें दौनें गी गै नौकरी शा बर्खास्त करी दित्ता गेआ ऐ। इंदी पंछान त्राल पुलवामा दे बसनीक जम्मू कश्मीर पुलास दे कांस्टेबल अब्दुल रहमान डार ते गुलाम रसूल भट्ट दे तौरा पर कीती गई ऐ। एह दौनें जने आतंकवादिएं दी मदाद लेई थेआर-असले ते गोला-बरूद गी गैर-कनूनी तरीके कन्नै इक थाहरा दूई थाहर पजाने दे दोषी पाए गे न। इंदे इलावा जेहड़े त्रीये मलाजम गी बर्खास्त कीता गेआ ऐ, ओहदी पंछान बनगाम दमहाल हांजीपोरा, कुलगाम दे रौहने आले शिक्षा विभाग दे अध्यापक शब्बीर अहमद वानी दे तौर पर सामने आई ऐ। ओह जमात-ए-इस्लाम कन्नै जुड़े दा हा ते इस गुट कन्नै हमदर्दी रखने आले लोकें दा नेटवर्क कायम करने च लग्गे दा हा। बर्खास्त कीता गेदा चौथ मलाजम वाटरगाम रफियाबाद बारामुला दा रौहने आला जल शक्ति विभाग दा असिस्टेंट लाइन मैन अनायतुल्लाह शाह पीरजादा ऐ जेहड़ा अल-बदर मुजाहिद्दीन गुट दा आवेर ग्राउंड वर्कर ऐ ते बक्ख-बक्ख चाल्ली कन्नै ओह आतंकवादिएं दे एजेंडे गी अग्गे बधाह करदा हा। ध्यानजोग ऐ जे सरकारै सरकारी सेवा दा लाह चुक्का करदे राष्ट्र-बरोधी तत्वें गी बिंद बी बर्दाश्त नेई करने दी नीति अपनाई दी ऐ। दफा-370 हटने दे बाद प्रशासन नै आतंकवादी गुटें लेई कम्म करने दे दोषी पाए गेदे तकरीबन 50 मलाजमें गी नौकरी शा बर्खास्त करी दित्ते दा ऐ।

<><><><><><>

Terror Baramulla

जम्मू कश्मीर पुलसै उत्तरी कश्मीर दे बारामुला जिले च आतंकवादिएं दे दऊं हैंडलरें दिएं संपत्तिएं गी अटैच करी दित्ता ऐ। पुलसै मूजब एडीशनल सेशनस कोर्ट, बारामुला थमां हुक्म रसाल होने दे बाद तिलगाम बारामुला दे रौहने आले जलील अहमद राथर ते मोहम्मद अशरफ मीर दिएं संपत्तिएं गी अटैच कीता गेआ ऐ। एह दवै आतंकवादी ऐल्ले पाकिस्तान च छप्पियै बैठे दे न।

<><><><><><>

DGP-JKP

जम्मू कश्मीर पुलस दे डरैक्टर जनरल आर.आर.स्वैन होरें आखेआ ऐ जे कनून नाफिज करने आली एजेंसिएं गी समाज-बरोधी तत्वें खलाफ सख्त कारवाई करनी पौंदी ऐ तां जे इस गल्लै गी जकीनी बनाया जाई सकै ते जम्मू कश्मीर च बने दे रमानदारी आले म्हौल च कोइ खलल नेई पवै। अज्ज पुलवामा च इक जनता दरबार लोआने परैंत पत्रकारें कन्नै गल्लबात च डीजीपी होरें गलाया जे प्रदेश च हाल च गै लोकसभा चुनाएं गी पूरी रमानदारी कन्नै करोआया गेआ ऐ ते पुलस दा मकसद ऐ जे इस रमानदारी आले म्हौल गी अग्गे बी इआं गै बरोबर बरकरार रखेआ जा।

<><><><><><>

Samba Shoot Out

सांबा जिले दे रीगल इलाके च जंदी रातीं अंतर्राष्ट्री बन्ने कश पेश आई दी गोलीबारी दी इक घटना च इक श्रमिक दी मौत होई गई। आकाशवाणी दे सांबा संवाददाता सतपाल शर्मा नै अधिकारिएं दे हवाले कन्नै खबर दित्ती ऐ जे जंदी रातीं तकरीबन 11 बजे अंतर्राष्ट्री बन्ने कश रीगल सरहदी चौकी दे नेडे इक निर्माण कंपनी आस्सेआ कम्में पर लाए गेदे इक मजूर गी चानचक्क गोली लग्गी गई। घटना दे बाद उसी जिला अस्पताल सांबा पजाया गेआ जित्थें डाक्टरें उसी

मोए दा आंदे दा घोषत करी दित्ता। ओहदी पंछान अखनूर दे रौहने आले 28एं ब'रें दे वासुदेव दे तौर पर कीती गई ऐ। सांबा दे एडीसी सुरेश चन्द्र शर्मा होरें एडीशनल एसपी हुंदे कन्नै अज्ज घटना आली थाहरै दा दौरा लाया ते मारे गेदे मजूर दे परोआर कन्नै बी मलाटी कीती।

<><><><><><>

NTA

मतेयान करोआने सरबंधी राश्ट्री अजेंसी एनटीए नै आखेआ जे राश्ट्री योग्यता नै दाखला मतेयान नीट-यूजी 2024 मुख्य भरै च बड़े गै पारदर्शी ढंगे कन्नै करोआया गेआ ते एहदी गरीमा कन्नै कोई समझौता नेई कीता गेआ ऐ। एह मतेयान 5 मई गी मुख्य भरै च करोआया गेआ हा ते एहदे परिणामें दी घोषणा 4 जून गी कीती गई। एनटीए दे निदेशक सुबोध कुमार सिंह होरें नमीं दिल्ली च पत्रकारें कन्नै गल्लबात करदे होई आखेआ जे पेपर लीक नेई होआ ऐ। उनें आखेआ जे नीट मतेयान कन्नै सरबंधी मसला 6 केन्द्रें ते उनें 1600 मेदवारें कन्नै जुड़े दा ऐ जिनेंगी गलत Question पेपर दित्ते जाने कन्नै समें बर्बाद होआ। उनें आखेआ जे एनटीए ने इक उच्च स्तरीय कमेटी दा गठन कीते दा ऐ जेहड़े इनें 1600 मेदवारें दी शकैतें दा जायजा लैग।

<><><><><><>

PM-Denmark

मनोमीत प्रधानमंत्री नरेन्द्र मोदी होरें डैनमार्क दे प्रधानमंत्री मैटी फ्रेडेरीक्सन हुंदे उप्पर हमले दी निंदेया कीती ऐ। इक सोशल मीडिया पोस्ट च श्री मोदी होरें आखेआ जे डैनमार्क दे प्रधानमंत्री हुंदे उप्पर हमले दी खबर कन्नै उनेंगी बड़ी मती चैंता होई ऐ। श्री मोदी होरें उंदी खरी सेहत दी कामना कीती। जंदी संजा इक हमलावर नै सेंट्रल कोपेनहेगन च डैनमार्क दे प्रधानमंत्री उप्पर हमला करी दित्ता।



CGI

श्रीलंका दी जाफना थाहर भारतीय कौंसलखाने नै सेहतमंद जीवन लेई चिकित्सीय योग दी इक विशेष कार्यशाला दा आयोजन कीता। कार्यशाला जाफना च मुख् सचिव ऑडीटोरियम च आयोजित कीती गई। इस कार्यशाला च भारत दे कौंसल जनरल साई मुरली ते उत्तरी सूबे दे मुख् सचिव ईलानगोवन सनें केई प्रमुख् हस्तिएं हिस्सा लैता। सोशल मीडिया एक्स उप्पर इक सनेह् च साई मुरली होरें आखेआ जे कार्यशाला च डेढ सौ ऐहलकारें हिस्सा लैता।



Hockey

एफआईएच हॉकी प्रो-लीग च जर्मनी नै भारत गी 4-2 कन्ने हराई दित्ता। उआं भारत शानदार शुरूआत कीती ते उन्ने जर्मनी उप्पर 2-0 दी बढ़त बनाई लैती पर भारत अपनी बढ़त कायम नेई रखी सकेआ ते खीरी च 4-2 कन्ने हार दा सामना करना पेआ।



Indo-Pak

आईसीसी विश्व कपक ल न्यूयार्क दे नसाऊ काउंटी अंतर्राष्ट्रीय क्रिकेट स्टेडियम च भारत ते पाकिस्तान बश्कार मैच खेड्डेआ जाग। अपने शुरूआती मैच च भारत नै आयरलैंड गी हराई दित्ता हा, जदके पाकिस्तान दी टीम गी अपने शुरूआती मैच च अमरीका दी टीम थमां हार दा सामना करना पेआ हा। तोआई अज्ज बडलै दे मैच च बंगलादेश नै श्रीलंका दी टीम गी दऊ विकटें कन्ने हराई दित्ता। पैहले बल्लेबाजी करदे होई श्रीलंका दी टीम नै 20 ओवरें च 9 विकटां मोआइयै 124 रंज बनाए। जेह्दे परते च बंगलादेश दी टीम 19 ओवरें च 8 विकटें दे नुक्सान

उप्पर 125 रंज बनाइयै मैच जित्ती गई। इक होर मैच च अफगानिस्तान नै न्यूजीलैंड थमां 84 रंजें कन्नै मैच जित्ती लैता ऐ।

<><><><><><>